

# Dithero tsa Tirelano mo Kutlwanong

01/2016 Thero ka Sontaga 1 mo sebakeng sa Adfente, e le ka 29. 11. 2015

**Mo leineng la Modimo o e leng Rara le Morwa le Mowa o o Boitshepo!**

Lefoko le le okamelang beke eno, le kwadilwe mo go Sagaria 9:9 le re: "Kgosi ya gago e e tla kwa go wena, e siame, e tletse pholoso."

1. Sefela sa 43 - 41/43

2. **Thapelo:** Morena Modimo Rara, o re fe Mowa o o Boitshepo wa gago gore o re sedimosetse ka one mo go reetseng Lefoko la gago kajeno. O re senolele ka Lefoko la gago gore re lemoge bosengsepe jwa rona, le diphoso le maleo a a bonalang mo ditsamaong tsa rona, re tle re ineele ka boikokobetso mo ditaolong tsa gago le mo dithulaganyong tsa gago tse re di rulaganyeditsweng mo tirelong eno ka ene Jesu Keresete Morena wa rona. Amen.

3. Lefoko la Testamente e kgologolo le kwadilwe m go Sagaria 9:9-10;

Epistolo ka fa thulaganyong ya 4 e kwadilwe mo Tshenolong 5:1-14;

Efangele ka fa thulaganyong ya 1 e kwadilwe mo go Matheo 21:1-9.

4. A go ipolelwe tumelo ya bokeresete!

5. Sefela sa 49 - 48/50

6. Thapelo ya mmadi wa thero.

7. **Epistolo** ka fa thulaganyong ya 2 e kwadilwe mo go Baroma 13:8-14, e re: "Lo fetse tsotlhe tse di tshwanetseng go lešwa, go sale go ratane fela; gonne yo o ratang yo mongwe o dirafaditse molao. Gonne ditaolo tse di reng: 'O se ka wa dira boaka; o se ka wa bolaya; o se ka wa utswa; o se ka wa supa tshupo ya kako; o se ka wa eletsa,' le fa go ka ne go le taolo e nngwe e sele, di akareditswe ka lefoko le le reng; 'O rate mongwe-ka-wena jaaka o ithata.' Lorato ga lo direle motho bosula; ke ka moo lorato e leng tirafatso ya molao. Dirang jalo, ka lo itse sebaka gore e setse e le nako ya go tsoga mo thobalong; gonne pholoso e re atametse jaanong bogolo go jale fa re simolola go dumela. Bosigo bo a sa, letsatsi le atametse; ka moo, a re apoleng ditiro tsa lefifi, re apareng marumo a lesedi! A re tsamaeng re itshotse sentle jaaka mo motshegareng, e seng mo medirong ya tlhapelo le ya botagwa, e seng mo marobalelong a boaka le mekgweng e e maswe,

e seng mo kgannye le mo lefufeng; mme aparang Morena Jesu Keresete, lo se tlameleng mmele ka mokgwa o o ka tsosang dikeletso tse di bosula." Amen.

8. Thero: Ditsala tse di rategang tsa Morena le Mopholosi wa rona Jesu Keresete, bomorwa le bomorwadie ba ga Rre ba lo leng Balutere, sebaka sa Adfente se simologile gape. Go tshujwa khantlele e le nngwe, di le pedi, di le tharo, di le nne ka tatelano, di tla tuka go ya mo bosigong jwa go gopola botsalo jwa Morena, ke fa go phatsima masedi mo setlhareng a a tshwantshang lesedi la nnete, e bong Jesu Keresete yo e leng lesedi la lefatshe le le sedifaditseng lefifi ka go re tlisetsa botshelo le pholoso mo lefifing la ba ba tshwenyegileng mo dikhutlong tsa lefatshe, ba ba senyegang mo moriting wa loso.

Sebaka sa rona se a fela, se feta ka lebelo le le boitshegang. Mongwe le mongwe o lemoga tseo, mme ke sesupo se sengwe fela se se supang gore Morena Jesu Keresete o tla bowa ka pele, o setse a le gaufi. Le fa go ntse jalo, ba le bantsi ba sa ntse ba lora fela motshegare ba ntse ba dira ditiro tsa bone tsa malatsi otlhe, ba gopola gore ba sa ntse ba na le sebaka sa lefatshe, ba re: Morena o ile, ga a nke a bowa ka gope, le fa poo ya gagwe ya go bowa mo kgalalelong go atlhola batshedi le baswi e atametse fela. Bofelo jo bogolo jo jwa bofelo bo ne bo setse bo atametse, ya re Paulo a kwadile Lokwalo go Baroma. Bo setse bo atametse bogolo jang ne kajeno! Morena o setse a eme mo mojakong kajeno. Molaetsa wa moapostolo le morongwa wa Modimo wa pholoso le botshelo jo bo sa khutleng o kgorogotsa tota gore mongwe le mongwe yo o tshelang mo lefatsheng a o tlhokomele, ka fa lefoko la thero ya kajeno le rayang ka teng, le re: "Lo itse sebaka gore e setse e le nako ya go tsoga mo thobalong; gonne pholoso e re atametse jaanong bogolo go jale fa re simolola go dumela. Bosigo bo a sa, letsatsi le atametse." Ke nako tota go lemoga ditshupo, fa e le nako. E a re kgorogatsa gore re tlhaloganye nako ya kajeno, re se ka ra tsiediwa, mme re dirise nako mo botshelong jwa rona, re se ka ra latlhegelwa ke phatlha ya go amogelwa mo botshelong jo bo sa khutleng jo re bo solofeditsweng go bo rua, e tla re lefatshe le le sena go fela. Jaaka go na le mekgwa e le mebedi e re tshelang ka fa yona mo lefatsheng leno, fela jalo go tla diragala mo sebakeng se se tlang se se sa khutleng, re ka amogelwa go tshela mo kgalalelong ya botshelo jo bo sa khutleng mo kagisong, le mo boikhutsong, gongwe re ka latlhelwa mo moleteng wa molelo, mo felong ga botlhoko le loso lo lo sa khutleng. Ga go na felo

ga boraro, re se na go tsosiwa mo lebitleng, go rewa botshelo mo legodimong, le loso le tatlhego mo moleteng wa molelo.

Ka ditlhagiso tsa Morena wa rona Jesu Keresete mmogo le tsa ga Rraagwe mo kutlwanong le Mowa o o Boitshepo, mo bongwengfela jwa Modimo o o Borarobongwe thomo le maikaelelo a Modimo ke a: O ikaelala gore rotlhe re pholosiwe, le go fitlha mo kitsong ya boammaaruri. Mo bofelong jwa dipaka tsa lefatshe leno go tla fitlhelwa ba ba tla nnang mo teng mmogo le Keresete mo kgalalelong, mo kagisong, mo boitumelong jo bo sa feleng, le ba ba tla nnang kwa ntle mo botlhokong jo bo maswe, go bogisiwa le go solofologa ka bo sa khutleng. Ba ba tla nnang ka fa le le jang ba tla apesiwa ka diaparo tse di phatsimang tsa lenyalo, tse ba apesitsweng ka tsona la ntlha mo kolobetsong, e bong kobo ya tshiamo ya ga Keresete, e re e balelwang ka go dumela mo go Keresete ka bopelotlhomogi fela, ka go tlapisiwa le go sweufadiwa mo mading a Kwana ya Modimo e e se nang molato, go sweufadiwa le go itshepisiwa gangwe ka boitshepo jo bo nnelang ruri, le go thatafadiwa le go bolokelwa mo tumelong e e pholosang ka mmele ole o re o neetsweng mo losong le ka madi a a boitshepo a re a tshologeletsweng go itshwarelwa maleo otlhe a rona le go abelwa botshelo jo bo sa khutleng le pholoso ya tshegofatso e e sa feleng. Mme ba mo go la molema mo ntlheng ya bahutsafadiwa ba tla ema fela ba ikapiseditse ka diaparo tsa go ikaya basiami ka ditiro tsa bone, ka tsa go direla medimako ya bona, e e seng sepe fela, ba latlhelwe mo lefifing mo tatlhegong e e boitshegang, kwa selelo sa tsholofologo le phuranyo ya meno di sa khutleng teng. Tsa ba ntlha diaparo tsa lesedi, tse di rokilweng ka nonofo e kgolo ya ga Keresete, tse e leng dikabelo tsa bopelotlhomogi jwa gagwe. Tse dingwe ke diaparo tsa ditiro tse di latlhwang le go hutsafadiwa le meriti ya lefifi, le phifalo le nyelelo ya lefela. Le fa nama e e bosula, e e sokamisitsweng ya rona e ntse e eletsa ka dikeletso tse di maswe go leka go ipaakanyetsa ka sengwenyana fa pele ga Modimo, ka re raelwa mo maikutlong a a leswafaditsweng ka bolelo go tsamya mo tseleng e e bophara, go batlega thata-thata fela go thanya, go lemoga kotsi e kgolo ka go leka go ikaega mo go borona jo bo bidiwang Atame, gongwe Efa yo mogologolo yo o ganetsang ditaolo tsa Modimo le ditsela tse di siameng tsa lesedi ka go fapogela mo medirong ya tlapelo le ya botagwa, le mo marobalelong a boaka le mekgweng e e maswe, le mo kgannye le mo lefufeng. Tseo ga se sepe, fa e se tsela ya lefatshe le

le wetseng mo boleong. Tsela eo e itsiwe ke Paulo, le rona re a e itse. Ke ya ga morwa yo o latlhegileng, ya baleofi, go tloga mo sebakeng sele sa bogologolo, e rile "Modimo wa bona maano otlhe a dikakanyo tsa dipelo tsa batho a le bosula fela ka metlha yotlhe," wa bona, fa bosula jwa batho bo ne bo ntsifala le bosula jwa go o ganetsa mo go kalo le go o galefisa mo go kalo gore o atlhole go senya lefatshe mmogo le batshedi le ditshedi tsotlhe ka morwalela ole wa ntlha, le go simolola sešwa ka go boloka Noah le bomorwawe fela. Go ne go tshwana fela le tshenyego ya ga Sodoma le Gomora, fa Modimo Rara o bolokile Lote yo o ikanyegileng le bomorwadie mo molelong o o sentseng metse ele. Mo sebakeng sa rona bolelo le borukhuthi jwa go ganetsa Modimo bo ntsifetse, o ka re: Bogolo, o ka re ka go feta tekano. Ba ba kaiwang batlhalefi ba bagolo kajeno ba rera ka manganga gore Modimo o sule, le bong jo bošwa bo fetola tlhago ya batho ka go ruta gore botlhe ba a tshwana fela, le fa ba tlhodilwe ke Modimo go farologana, mo godimo ga moo ba atlholela molato o mogolo ba ba sa ntseng ba tlotla dineo tse dintle tsa Modimo, jaaka thatano le nyalano ya monna le mosadi, ba femela go senya sebopelo ka melao gore go gogiwe madi mo go maswe, go bolawe masea a le mantsi, gongwe ba leka go femela le bone ba ba khutshwafatsang botshelo jwa ba ba bokoa, ba re: Ga ba tihole ba na le thuso, e le morwalo fela mo go ba ga gabo, ba re: Ba ba bokoa bao ba thibela tswelelo pele, ba re: Ke kgololesego ya gore motho a ikatlholele ka fa a ratang ka teng, ba e bitsa "euthansia". Ga go na lereo la Setswana. Ke se se rayang makgakga a ba a tlhalosang, ba re: Ke "polao ya lorato". Tota, fa Modimo o ne o tukile bogale mo sebakeng sa ga Noa le Lote, le ka nako ya Moše, fa mophato wa ga Farao o nweditse mo lewatleng, bogale jwa ona bo tla tuka jang ka go tukisiwa ka makgakga a maleo a rona mo sebakeng sa bofelo. Le fa ke sebaka, fa go rutilwe ditaolo tsa ona mo mafatsheng kwa moseja le mo Aferika gore motho a se ka a nyatsa Motlhodi, le e seng go bolaya, go kgokafala, go utswa, le e seng go bua maaka, le fa re ne re itumelela go gololwa mo go "Apartheid" mo lefatsheng la rona le mo mebusong ya ba kwa moseja mo mafatsheng a mangwe a kwa Aferika, re utlwa botlhoko ka go utlwa ka ga ditirelo tsa medimako, sebedu, manyalo a lefufa le kwa Nkandla, disubukanyo, le dipolao kwa Marikana, kwa Rwanda, Sudane, Egepeto, Zimbabwe, badipa ba ba lorang gore ba tla phologa fela. Bogolo go moo go sa ntse go na le nyatsego ya Modimo le poporanyo tse di sa angweng mo dikoranteng, gongwe mo

dinkgannyeng tsa radio gongwe tsa telebišene tse di fetang tse di galefisang mewa ya badumedi. Gongwe o gopola gore go setse boitsholo jo bo itumedisang mo metseng le mo ditshikeng tsa lefatshe la ga etsho? Re ka reng ka lorato lwa kamogelano, le thusanyo le ba e seng ba losika lwa batho? A ga se gore ditshebo, boithato, ditsietso di ntsifetse, le bosula mo dintlheng tsotlhe? A botshelo bo tshwanetse go tshwaiwa le mo nakong ya kajeno, jaaka Modimo o bo tshwaile bogologolo ka gore: "MORENA o lebile bana ba batho a le mo legodimong; go bona fa go le mongwe yo o botlhale, yo o batlang Modimo, ba fapogile botlhe. Ga go ope yo o dirang molemo, le e seng a le mongwe fela." Dip. 14:2-3.

Go ntse jalo, le fa kitso ya thato e e boitshepo ya Modimo le molao wa ona o tsentswe mo dipelong, batho ba gakololwa ka segakolodi sa bone. Batho ba a itse gore ke molato go tlola ditaolo tse di umakiwang mo lefokong la thero ya kajeno, e bong taolo ya 6, le ya 5, le ya 7, le ya 8, le ya 9 tse di reng: 'O se ka wa dira boaka; o se ka wa bolaya; o se ka wa utswa; o se ka wa supa tshupo ya kako; o se ka wa eletsa.' O a di tlhalosa ka gore: "le fa go ka ne go le taolo e nngwe e sele, di akareditswe ka lefoko le le reng; 'O rate mongwe-ka-wena jaaka o ithata.'" Go itsiwe le ditaolo tsa letlapa la 1 gore re boife Modimo, le go o rata bogolo ga dilo tsotlhe, le go o ikanya ona fela, re se dirise leina la ona mo go se se sa tshwanelang, le go rate thero le lefoko la ona le go di ithuta ka boitumelo, go tshelela Lefoko le le boitshepo la ona le le tshelang, e bong Jesu Keresete, re mo sale morago mo tseleng ya lesedi, go ya a bowe go atlhola batshedi la baswi.

Ke dikgang tse di botlhokwa, gonne di ama bakhutlo jwa batho botlhe ba ba sa ntseng ba tshela. Ke ka ntlha ya moo fa e le nako ya go tsoga, le bo ineela mo Modimo re tlhokomele se re se ikaelelang gore re rata go gorosiwa kae gore maikaelelo a rona a tshwane le se Jesu a se ikaelelang ka lorato lwa gagwe. Morena wa rona Jesu Keresete o re laletsa gore re nnele ruri mo go ene, re kopane le ene mo moletlong wa gagwe mo legodimong, a re: "Tlaang kwano go nna lotlhe ba lo lapileng, ba lo imelwang, mme ke tla lo lapolosa," le go lo pholosa." Sebaka sa botshelo mo lefatsheng bo khutshwane thata, fa o bo lekanya le botshelo jo bo sa khutleng mo legodimong. Ke gona go leng molemo go tlhokomela pitso e re biditsweng ka yona go rata bangwe-ka-rona, jaaka Jesu a re ratile. Ke tlhaloso ya botshelo jo bo natefelang Morena le maikaelelo a gagwe gore re se utlwise ope botlhoko, mme re senke go apola ditiro tsa lefifi, re

apare marumo a lesedi, re tsamae re itshotse sentle jaaka mo motshegareng, re apare Morena Jesu Keresete," re kgaogane le ditiro tsa lefifi, re rate, re se tlhopholole ope ka fa selekanyong sa difatlhego tsa batho, gongwe ka fa bong jwa bona, le e seng ka fa kemo ya bone mo gare ga batho, re tlhokomele gore melato yotlhe e phimolwe, re itshwarelane, le go ratana le botlhe, re rate le dira tsa rona, re di kopele boitshwarelo jaaka Jesu a dirile mo sefapaanong. Amen.

**9. Thapelo:** Morena Modimo Rara yo o mo legodimong, re lebogela Lefoko la gago le o re tthagisang ka lona. O re fe nonofo ya go tlabana le boferefere jwa ga Satane yo o lehang ka metlha go re robatsa ka maitumelo a lefatshe. A o ko o re tsoseletse ka molao wa gago gore re itemoge, fa re le baleofi, o bo o re tsoseletse ka Efangele ya gago go lemoga gore re baakanyeditse pholoso ke Morwao Jesu Keresete, re tle re lemoge, fa e le nako ya go latola tsa lefatshe, fa e le nako ya go itumelela Lefoko la gago ka ene Jesu Keresete Morena Morepholosi. Amen.

Thapelo ya Morena: Rara wa rona yo o mo legodimong ...

**10. Sefela sa 47 - 45/47**

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke K. P. P. W. Weber, ka ngwaga wa 2015

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.